

إلى الأوركا وصل

نشان زيد علي عشر

إلى الورا يا رومل

(مسرحية)

بقلم :

نشوان زيد علي عنتر

٢٠٢٤م

المشهد الأول

(تفتح الستارة)

(يظهر على الخشبة خندق مبني من أكياس الرمل المكدسة بترتيب منظم تابعة للجيش المصري في منطقة المزارع الصينية بشبه جزيرة سيناء خلال حرب ٦ أكتوبر عام ١٩٧٣م و جنديان شابان بكامل عدتهما العسكرية و أسلحتهما إحداهما يدعى منصور كامل و الآخر حسين مغاوري)

حسين (يتأمل منصور و بيده كتاب يتصفحه) : بتعمل إيه يا منصور ؟

منصور : زي ما أنت شايف ، بأقرا كتاب .

حسين : دا وقته يا منصور ؟ أنت مش شايف إنحنا في حالة حرب ؟

منصور : عارف يا حسين ، بس الجبهة هادية لغاية دلوقتي ، فيها إيه لما أقرا كتاب ؟

حسين : حبكت القراية يعني ؟ (ينظر منصور إليه بإنزعاج صامت) طيب يا سيدي ، إيه الكتاب اللي خلاك تنسى الدنيا و اللي فيها بشكل اللي ده ؟

منصور : ده مش أي كتاب يا حسين ، دي مذكرات مثلي

الأعلى رومل العسكرية ؟

حسين : ثعلب الصحراء ؟

منصور : إسم الله عليك ، ثعلب الصحراء .

حسين : و دا إشتريته إمتي ؟

منصور : لا إشتريته و لا حاجة ، دي من كتب أبوي اللي

أخذتها من المكتبة بتاعته في بيتنا الأولاني بالبدرشين أيام ما

كان بيشتغل بمصلحة الري هناك .

حسين : أيوه عارفه ، مش دا اللي كان قدام محطة القطر

على بعد عشر خطوات ؟

منصور : بالضبط ، قبل ما نتقل لبيتنا الجديد في العمرانية

..... يا ريتنا ما نقلنا هناك .

حسين : ليه ؟ حصل إيه هناك !؟

منصور : حكاية طويلة أبقى أشرحها لك بعدين لما نرجع من

الجهة ، خلينا في موضوع الكتاب اللي في إيدي .

حسين : بس قبل ما تكلمني عن الكتاب دوت ، إنت شايف

إن دا وقت مناسب للقراءة في ظروف زي ديه ؟

منصور : دا على أساس إن الضرب بالمدافع و الرصاص
شغال حوالينا من كل ناحية لغاية دلوقتي ؟ أنت مش شايف
الهدوء العجيب في أرض المعركة دوت ؟!

حسين : على رأيك ، إحنا ورانا حاجة ؟ بعدما كنا بنضرب في
الإسرائيليين ضرب من رحمة و بحماس شديد لدرجة إنهم
كانوا يهربوا من قدامنا زي الفيران قبل ما تيجي أوامر عليا من
فوق نوقف مكانا و ما نحاربهمش و لا نطاردهم من غير ما
نعرف السبب ، ليه ؟ ما أعرفش .

منصور : أهو دا اللي أنا بأسأله لنفسى برضو ، ليه ؟ ما إحنا
كنا كويسين و الأمور في أرض المعركة لصالحنا بعدما ما بقينا
فايتين في عمق سيناء و فجأة يقولولنا ما تحاربوش ، ليه ؟

حسين : مش جايز الإسرائيليين خلاص هربوا مننا و إستسلموا
لينا لما شافوا قوتنا و جبروتنا اللي مالوش مثل و يطلعوا من
سيناء غصب عنهم .

منصور : و مش جايز يكون فخ منصوب لينا ؟

حسين : فخ منصوب لينا ؟! من مين ؟!! من الإسرائيليين
!!!؟

منصور : أو من القادة بتوعنا .

حسين : من القادة بتوعنا؟! مش ممكن

منصور : لا ممكن ، و لا نسيت اللي حصل لنا في ٦٧ ؟

.....

حسين : تاني يا منصور تاني ؟

منصور : تاني و تالت و رابع ، اللي حصل في الحرب

الملعونة دي ما يتنسيش و لو بالطبل البلدي .

حسين : عندك حق، و خصوصا اللي حصل في منطقة أبو

عجيلة ، فاكر ؟

منصور : و دي حاجة تنسي يا صاحبي ؟ دا أنا فاكر كمان

أن قدرنا نضرب الإسرائيليين ضرب الدبابات اللي معانا لغاية

ما خليناهم يهربوا من قدامنا زي الفيران .

حسين : و أنا لسه فاكر إن القائد بتاعهم ابن الكلب شارون

هرب قبليهم بعد ما إتجرح في رجله اليمين ، ها ها ها .

منصور : ها ها ها ، أيوه أيوه. فاكر ، من ساعتها ما قدروش

يقتحموا قواتنا المحاطواهم من كل ناحية مع إن سلاح

الطيران كان معاهم و إحنا مش معانا .

حسين : مش بس كده ، دا إحنا وقعنا لهم ست طيارات
حربية مرة واحدة و إحنا جوه جبال أبو عجيلة بصواريخ أرض
جو و المدافع الجوية بتاعتنا .

منصور : بالضبط ، وقتها كنا مسيطرين على حدودنا مع
إسرائيل قبل ما نتفاجئ بالكارثة اللي حصلت بعد يومين من
المعركة .

حسين : صدرت الأوامر لينا بالإنسحاب من أبو عجيلة و
العريش و من سيناء كلها لغاية الضفة الغربية من القنال من
غير ما نعرف السبب ، يعني الإسرائيليين خدوا سيناء كلها
بأرضها و ناسها بيضة مقشرة على طبق من ذهب من غير ما
يضربوا رصاصة واحدة خالص ، طب ليه ؟

منصور : لأن دي أوامر الإنسحاب السوداء دي جايه من فوق
من عند الرئيس .

حسين : الرئيس ؟ ريس مين ؟

منصور : جرى إيه يا حسين ؟! ما تفتح مخك شويه ؟!!
الرئيس جمال عبدالناصر .

حسين : الرئيس جمال عبدالناصر بذات نفسه ؟!!

منصور : أومال بالبريد المستعجل ، طبعاً بذات نفسه ، دا حتى أنه صرح بيها قدام الخلق في الخطبة بتاعته اللي إذاعوها في الإذاعة و التلفزيون ، دا حتى بالأمانة قايلهم إن سبب الإنسحاب بالشكل ده هو هزيمتنا المرة في الحرب ، حتى شوف (يقلد صوت الرئيس جمال عبدالناصر و حركاته) ((أيها الإخوة المواطنين ، لقد كبدنا العدو خسائر فادحة في العتاد و السلاح و الأرواح ، و حفاظاً على ما تبقى من جيشنا العظيم أمرت بسحبه من شبه جزيرة سيناء إلى خط الدفاع الأخير في الضفة الغربية لقناة السويس)). .

حسين : إحنا إتهزمننا قدامهم و هربنا منهم؟! إزاي!!؟ إذا كنا قبل شويه المنتصرين في أرض المعركة مش هم ، و ما قدروش يخشوا سينا و إحنا موجودين ، على أساس إيه بيقول الكلام ده؟!!

منصور : على أساس إن ما عندناش سلاح طيران يحمينا منهم بعد ما إدمر على أيديهم في ٥ يونيو ، و نسي أنه هو السبب في اللي حصلنا هناك .

حسين : كلام إيه اللي بتقوله يا منصور؟!!

منصور : الحقيقة يا حسين ، الحقيقة اللي أنا و إنت و غيرنا
من المصريين بنهرب منها و مش عارفين ليه ؟ يا إما خايفين
منه حتى بعد موته يا إما بنحبه و نعبده أكثر من ربنا و العياذ
بالله مع إننا عارفين إنه سبب هزيمتنا في حرب ٦٧ ، من اللي
عين صاحبه المشير عامر قائد للجيش برغم بلاويه و هزايمة
العسكرية المنيلة بنيلة أيام العدوان الثلاثي و الوحدة المصرية
- السورية و حرب اليمن مش جمال عبدالناصر ؟ مين اللي
خلي الطائرات الحربية بتاعتنا مكشوفة قدام طائرات العدو
اللي فضلت تضرب فيهم لغاية ما مسحوها بأستيكه صبحية
خمسة يونيه من غير ما يحميها أو يخبيها في مكان سري و
آمن ما حدش يعرفه غيره قبل هجومهم الجوي بيومين مش
جمال عبدالناصر ؟ مين اللي بطل يحارب إسرائيل في خمسه
يونيه بعد ما أقفل مضيق تيران قدام السفن الإسرائيلية و بعث
الصاعقة في مهمة سرية لتدمير الطائرات الإسرائيلية اللي
عرف إنها حتهاجم الطائرات بتاعتنا في خمسة يونيه جوه
المطارات بتاعتهم مش جمال عبدالناصر ؟

حسين : حيلك ، حيلك أومال ! دا إيه الحقد و الغل اللي
جواك عالراجل !؟

منصور : دا مش حقد و لا غل ، دي الحقيقة

حسين : حقيقة إيه يا جدد إنت؟! ما ناقص غير تقوللي أنه
سلم سيناء و الجيش بتاعنا للإسرائيليين على طبق من ذهب و
حكاية الحرب ضدهم كانت تمثيل في تمثيل!؟

منصور : ما هو ده اللي حصل فعلا

حسين : ششش ! وطي صوتك لاحد يسمعنا ، الحيطان ليها
ودان .

منصور : ما يسمعوا ، الراجل اللي كنا خايفين منه و يكمم
أفواهنا بزوار الفجر و ضباط الأمن و المخابرات بتوعه راح
خلاص هو و اللي معاه و غاروا في ستين داهية .

حسين : بس الناس عندنا و خصوصا زمايلنا اللي في الخندق
ده لسه مصدقينه و مش أي كلمة وحشة تتقال عليه لغاية
دلوقتي .

منصور : حتى بعد ما عرفوا حقيقته و بلاويه السودا!؟

حسين : حتى بعد ما عرفوا إنه هو اللي كان ورا هزيمتهم في
حرب ٦٧ و سلم سيناء و الجيش بتاعنا للإسرائيليين على
طبق من ذهب ، دا لو كان الكلام اللي أقلته قبل شويه
مضبوط .

منصور : قصدك إيه يا حسين ؟

حسين : قصدي واضح يا ابن والدي ، مش معقول زعيم بحجم الرئيس جمال عبدالناصر يفضح نفسه بالشكل ده و يسلم جنوده و سيئا للإسرائيليين تسليم أهالي من غير إحم و لا دستور .

منصور : لا ممكن يا صاحبي ، زي ما عمل هتلر برومل في معركة العلمين الرئيس جمال عملها معانا في ٦٧ .

حسين : هو إيه اللي عمله هتلر مع رومل في معركة العلمين ؟

منصور : بعدما إنتصر رومل على جيوش الحلفاء و أولهم الجيش البريطاني و أجبر القائد بتاعهم مونتهجمري على الإنسحاب في الأيام الأولى للمعركة و بعدما كان ضامن النصر في جيبه يتفاجئ بأن الطيارات الحربية اللي كانت بتضرب العدو بتاعه و قوات الفيلق الأفريقي إنسحبت بأوامر عليا من هتلر من غير سبب ، و ده سهل مهمة مونتهجمري قوي و حول هزيمته لنصر كاسح .

حسين : مش للدرجة دي يا منصور ، إنت أكيد بتهزر
(في تلك الأثناء ، يدخل فجأة إلى الخشبة رجل أشقر ذو

قسمات وجهه شامخة مهيبة الطلعة يرتدي بزرة عسكرية خاصة
بالجيش النظامي النازي ألا و هو رومل)

رومل : صاحبك ما ييهزرش أبدا .

حسين (مفزوعا) : بسم الله الرحمن الرحيم ، ححححضرتك
مين؟! و دخلت هنا إزاي!!؟

رومل : أنا رومل يا ججع ، و مش مهم تعرف دخلت هنا إزاي
، المهم إنك تعرف إن الكلام اللي قالوه صاحبك صح مية
في المية ، و عندي الدليل على كده .

(تنزل الستارة)

المشهد الثاني

(تفتح الستارة)

(يظهر في الخشبة نفس الأثاث و الديكور السابقين و نفس

الشخصيات الثلاثة ، منصور و حسين و رومل)

منصور : أيه هو الدليل على خيانة هتلر ليك يا جنرال رومل ؟

حسين : حيلك أومال يا منصور ؟ هو أنت صدقته على طول

!؟

رومل : قصدك إيه ؟

حسين : قصدي إنك لا رومل و لا يحزنون

منصور : جرى إيه يا حسين ؟ إحنا هنهرج ؟

حسين : من فضلك يا صاحبي إحنا في حالة حرب ، مش كل

عسكري غريب يجي لنا من الطرف الثاني نصدقه و نأخده

بالأحضان .

منصور : يا سلام !؟ حبكت يعني الإحتياطات الأمنية بتاعتك

!!؟ ما ناقص تقوله كلمة السر إيه !؟ يا بني آدم ،

الراجل جاي لحد عندنا ببدلته العسكرية بتاعة قادة الجيش

النازي و بيرطن الماني زي أهلها ، ناقص إيه ؟ البطاقة الشخصية ؟

حسين : لا ، ناقص البطاقة الضريبية ! في إيه يا منصور ؟ مش عشان هو شبه مثلك الأعلى رومل و مش عارفين طالع منين تصدقه على طول ، مش جايز يكون جاسوس إسرائيلي من غير ما نعرف ؟

رومل (يمسك ببزة حسين المذهول العسكرية) : بأقولك إيه ، أنا ساكتك من الأول و بأقول يا هادي ، لكن توصل بيك إنك تقول عليا جاسوس لولاد الكلب و زبالة البشر دول لا و ستين لا (ما إن يهيم بضربه حتى يوقفه منصور و يهدئ من غضبه و يفصل بينه و بين زميله حسين)

منصور : وحدوا الله يا جماعة دا شيطان دخل بينكم ، ما تزلعش قوي يا جنرال رومل من الكلام اللي قاله حسين ، أصله خايف علينا و بيأدي واجبه و خصوصا إنحنا في حالة حرب وسط ضرب المدافع و الغارات الجوية زي ما إنت شايف ، أدي الحكاية و ما فيها .

رومل : إذا كان كده يبقى معلش .

منصور : أفتكري يا حسين إنك عرفت إنه رومل بحق و حقيقي
، مش كده ؟

حسين : و هل يخفى القمر ؟ أكيد طبعاً .

منصور : لا مؤاخذة يا جنرال ، الكلام خدنا عن الدليل الذي
بتثبت فيه خيانة هتلر ليك في معركة العلمين .

رومل : آه إفتكرت إسمعوني كويس إنتوا الإثنين ،
لأن اللي حاقولهمك دلوقتي خطير جدا جدا .

منصور و حسين : للدرجة دي ؟!

رومل : و أكثر !

(تنزل الستارة)

المشهد الثالث

(تفتح الستارة)

(يظهر في الخشبة ديكور لمعسكر صحراوي الماني في مدينة العلمين المصرية ، و يظهر فيه أيضا رومل مع قادة جيشه)

رومل (يشير بيده إلى خريطة المعركة و من حوله بعضا من أركان جيشه هانزل و رايسكه و موللر) : زي ما أنتم شايفين ، إحنا قدرنا نجبر الإنجليز إنهم ينسحبوا من العلمين لغاية سيدي جابر بعد ما دمرنا نص الدبابات بتاعتهم شمال أرض المعركة بأسلوب الإلتفاف المحوري ، و علشان نقضي عليهم و نكرشهم من مصر لازم نواصل هجومنا الشامل عليهم بكرة .

هانزل : بكرة بكرة ؟

رومل : أيوه بكرة يا كولونيل هانزل ، لازم نسد الثغرات في جبهتنا العسكرية من العلمين لغاية الوادي الجديد على الحدود المصرية - الليبية و نقطع مصدر تمويلهم بالبترول و الغذاء من هناك و ما نخليهومش يستريحوا على الآخر علشان نقدر نحتل الإسكندرية و القاهرة لغاية قناة السويس .

هانزل : بس يا جنرال كده حنخسر كثيرا .

رومل : قصدك إيه يا كولونيل ؟

هانزل : قصدي إن الانتصار العظيم اللي حققناه ضد الإنجليز دلوقتي في العلمين كلفتنا خساير هايلة في الأرواح و الأسلحة و البترول وسط الحر و القرف اللي جنودنا عايشين فيه من غير راحة و لا شربة ميه حتى ، فما بال سيادتك حنخسر كام لو واصلنا الهجوم عليهم ؟

رومل : دا على أساس أن الإنجليز المهزومين صاغ سليم ما حصلوهمش حاجة و لا خسروا حاجة ؟ جرى إيه يا كولونيل ؟ من إمتى جيشنا النازي اللي هو أعظم جيش في العالم يهتم بالحاجات التافهة دي ؟ ما دام ماشيين صح في الخطة بتاعتنا و ظهرنا و خطوطنا الخلفية من محور طبرق شرق ليبيا لغاية جنوب تونس و الجزائر متأمناه و مواردنا من السلاح و البترول و الأكل و الشرب متأمناه برضو ، و فوق كل كل ده سلاح الطيران بيحمينا و يغطينا من هجمات العدو يبقى ما نشغلش بالناس بالخسائر البشرية و المادية لجيشنا لأنها مش مهمة بالنسبة لنا خالص .

هانزل : ما هو دا الموضوع اللي كنت عايز أكلمك فيه ضروري يا جنرال .

رومل : كولونيل هانزل ، أنا زهقت من اللف و الدوران بتاعك ،
دغري خش في الموضوع على طول .

هانزل (ينظر إلى رايسكه) : ما تتكلم يا كولونيل رايسكه ،
قول أي حاجة .

رايسكه : أقول إيه يا كولونيل ؟ هي دي حاجة تتقال ؟

رومل (غاضبا) : ما تتكلموا إنتوا الإثنين ، وترتوا أعصابي ؟

رايسكه : الحكاية يا جنرال إنه جالكم تلغراف من برلين قبل
ساعتين .

رومل : من الفوهرر ؟

هانزل : أيوه يا جنرال .

رومل : و عرفتوا إنه من الفوهرر إزاي ؟

موللر : أصلنا قاريناه وقت ما وصل .

رومل : قاريتوه قبلي ؟! إنتوا إزاي تقرئوا تلغراف مبعوث ليا

أساسا ؟ إنتوا ناسيين إني القائد بتاعكم ؟

رايسكه : أصلك كنت مشغول بتفتيش المونة العسكرية

بتاعت الجيش و تأخرت كثير ، فحينا نعرف إيه جوا

التلغراف و خصوصا إنها جاية من زعيمنا و قائدنا العظيم
الفوهرر هتلر و لازم تترد بسرعة ، و ياريتنا ما قارينهاش .

رومل : ليه ؟ هو في إيه التلغراف ده ؟

رايسكه : مصيبة يا جنرال مصيبة .

رومل : الفوهرر جرى له حاجة ؟ و لا إتهزنا قدام روسيا ؟

هانزل : أنا شايف يا جنرال إنك تقراه سيادتك و إنت تعرف
الحقيقة .

رومل : هو فين التلغراف دوت ؟

موللر : أهو يا فندم .

رومل : هات (يخطف التلغراف من يد الكولونيل موللر و
يقراه بقلق شديد إلى أن إنتهى من قراءته و الدهشة تعلق
وجهه الصارم) أنا مش مصدق اللي أنا قرته ده ؟! الفوهرر أمر
بسحب سلاح الطيران بتاعنا و نص جيشنا و بعثهم للجبهة
الروسية ؟! ليه ؟! دا إحنا كنا حنطرد الإنجليز من
مصر كلها بعد ما نهجم عليهم بكرة ؟!!! ليه يعمل فينا كده
!!!؟ ليه ؟ ليه ؟ ليه ؟

(تنزل الستارة)

المشهد الرابع

(تفتح الستارة)

(يظهر على الخشبة نفس الديقور و نفس الشخصيات داخل المعسكر المصري خلال حرب ٦ أكتوبر في المشهد الأول)

منصور : و طبعاً سحب هتلر الطيران و القوات البرية اللي بتحمي ظهركم على طول من غير ما تعترضوا عليها ؟

رومل : أكيد طبعاً .

منصور : حتى و لو عرفت أن اللي عمله ده يخيلكم تخسروا المعركة و الحرب في مصر ؟

رومل : طبعاً عارف ، بس ده هي الأوامر و لازم ننفذها

منصور : أوامر ! أوامر ! أوامر ! فلقتونا بحكاية الأوامر ده

حسين : جرى إيه يا منصور ؟ متضايق كده ليه من كلام الراجل ؟ اللي زيه طبيعي إنه ينفذ الأوامر ، لأن إحنا في النهاية عساكر و جنود و مهمتنا تنفيذ الأوامر اللي جايه من قادتنا الأعلى مننا .

رومل : أهو صاحبك اللي مش طايقه قال الحقيقة الغاية عنك ، إحنافى النهاية عساكر و جنود بنفذ الأوامر اللي من قادتنا الأعلى منا .

منصور : و هو قدرنا إحنافى ننفذ أوامرهم حتى و لو كانت غلط ؟ بشرع مين ده ؟

رومل : بشرع المنهج العسكري اللي تربينا عليه جوه الكليات و المدارس الحربية فى البر و البحر و الجو و خلتننا وحوش من البنى الآدميين قلبهم ميت ما يخافوش من أى حاجة قدامهم حتى و لو كانوا أهاليهم عشان ينفذوا الأوامر اللي جايه من أسيادهم و أبهاتهم الجداد ليوم الدين .

منصور : و لو ما نفذناش أوامرهم لا سمح الله حيحصل إيه ؟

حسين : حيحصل كثير ياخي ، حتتحال للمحاكمة العسكرية و تتجازى يا يوقفوا ترقيتك أو يسجونك أو يعدموك ، يعنى حتخسر سمعتك أو حياتك .

منصور : و الله أخسر سمعتي أو حياتي أهون بكثير من إني أضحي بلدي و إسلامها للعدو على طبق من ذهب عشان أنفذ أوامر قائد مستهتر و خائن .

حسين : ثاني يا منصور ثاني ؟

منصور : ثاني و ثالث و رابع يا حسين ، إحنا ما إتخلقناش
عشان ننفذ أوامر غيرنا حتى و لو كانت غلط ، إحنا إتخلقنا
عشان ندافع عن بلدنا ضد أي عدو يهددها جواها و براها .

حسين : أيوه ، و نخالف الأوامر عمال على بطال بحجة
الدفاع عن الوطن زي كان الإخوانية بيعملوا في الجيش
بتاعنا وقت حرب فلسطين ، مش كده ؟

رومل : لا يا حسين ، إحنا مش قطاعين طرق و لا جماعات
إرهابية و لا مليشيات مسلحة عاملة نفسها دولة جوه الدولة
أو جيش جوه الجيش و تنشر الخراب و الدمار و الفساد
جوه البلد باسم الوطن أو الإسلام أو العروبة من غير ما
تتحمل مسؤولية أغلطها أو تتجازى عليها ، لكن إحنا ضباط
في الجيش بنلتزم بعقيدة قتالية محددة و ننفذ أوامر اللي
فوقنا سواء كان صح و لا غلط ، و إذا ما إقتنعناش بالأوامر
دية ما نفذهاش خالص حتى لو كان موتنا ، و ده اللنا اعملته
فعلا .

منصور : هو أنت قررت ما تنفذش أوامر الفوهرر هتلر خالص
!؟

رومل : أيوه بس بعد فوات الآوان .

حسين : إمتى ؟ وقت معركة العلمين ؟

رومل : لا لما نقلوني على المانيا فورا بعد ما إتهزمتنا في المعركة ، أنا في الأول كنت عاذره على أوامره الغلط لأن بلدنا كانت بتحارب في أكثر من جهة في وقت واحد ، لكن لما شفت إن أوامره الغلط خلتننا نخسر فرنسا بعد عملية النورماندي و روسيا و اوروبا الشرقية و إبتدا الحلفاء يحاوطوا بلدنا من كل جانب قلت ما بدهاش ، فعصيت الأوامر و حاولت أزيح الفوهرر من الحكم .

منصور : هو أنت عملت إنقلاب عسكري عشان تتطلعاه من الحكم ؟

رومل : أيوه مع مجموعة من زملائي اللي كانوا معايا في الفيلق الأفريقي ، لكن للأسف فشلنا و تم إعدامنا كلنا بسم السارين (في تلك الأثناء ، يسمع صوت دوي إنفجارات و لعلعة الرصاص و قصف مدافع و غارات جوية بشكل قريب و مفاجئ من الأكياس الرملية المرصوفة في خشبة المسرح و الجنود المصريون يمرون من أمامهم جيئة و ذهابا بين قتيل و جريح على الخشبة) أيه اللي بيحصل ده ؟

منصور : علمي علمك يا جنرال ، يظهر أن الحرب قامت في
منطقتنا من ثاني

حسين : من غير ما يقوللنا إن فيه هجوم علينا و لازم نكون
في مواقعنا و على أتم إستعداد للرد عليهم ؟

منصور : يبقى الحكاية فيها إن (إستوقف منصور أحد زملائه
المارين في الخشبة أمامه و يدعى شوقي) قولي يا شوقي ، إيه
اللي بيحصل دلوقتي ؟

شوقي : يعني قاعد مكانك زي فرقع لوز و ما أنتش ياخي ؟

حسين (يمسكه من بزته العسكرية بشدة) : رد على السؤال يا
بني آدم ، اللي بيحصل دلوقتي ؟

شوقي : كارثة يا حسين كارثة ، الجنود الإسرائيليين بقوا جوه
المعسكر بتاعنا من صبحية ربنا و بيضربوا فينا من غير رحمة .

منصور : و ليه القائد بتاعنا ما قلناش أن الإسرائيليين
حيهجموا علينا النهاردة ؟

شوقي : قائد مين يا عم إنتا ؟ القائد و رجالته ما لهم أي أثر
من إمبراح ، أوعى من سكتي (يخرج من الخشبة) .

حسين : ما لهم أي أثر من إمبراح ؟! يعني إيه ؟!!

رومل : يعني غدروا بيكم يا فالح و سلموكم للعدو الإسرائيلي
تسليم أهالي .

منصور (يضرب بكفيه على ساقيه من شدة الصدمة) : أهو ده
النا كنت خايف منه يا حسين و حصل ، من وقت مازهقنا
من كتر القعدة من غير حرب و لا شغل و لا مشغله وسط
الهدوء المريب جوه المعسكر بتاعنا و معسكر العدو اللي
مقابلينا و ما سمعناش منهم لا حس و لا خبر ، أتاري القائد و
الإسرائيليين طابخينها سوا من ورانا و إحنا مش عارفين
(بيكي)

حسين : و زي ما حصللنا في ٦٧م حصل مرة ثانية دلوقتي ،
طب ليه ؟ يطلعوا مين دول الإسرائيليين الصهانية عشان
نخاف منهم بالشكل ده ؟

رومل : و لا حاجة ، هم و لا حاجة ، اليهود دول صهانية
كانوا و لا إسرائيليين و لا أي حاجة ثانية ما يخوفوش نملة و
لا صرصار حتى ، و عشان هم جناء و خدامين لأسيادهم في
اوروبا و أمريكا يعملوا فيهم اللي هم عايزينه ضدكم إنتم يا
عرب و يا مسلمين .

حسين : و مادام هم جناء و خوافين و ما يخوفوش نملة
حتى ليه إحنا العرب و المسلمين بيخافوا منهم قوي لدرجة
دي ؟

منصور : لأن المشكلة فينا مش فيهم ، لأننا بنرفع السلاح
في وش بعضينا بدل ما نرفعه في وشهم ، هم رغم جنبهم إيد
واحدة و عندهم ثقة بنفسهم و بقضيتهم حتى و لو كانت
غلط ، مش زينا متفرقين و كارهين بعض و ما عندناش ثقة
بنفسنا و لا بقضيتنا اللي صح مية بالمية مع إننا أشجع منهم
و أشرف و أنبل منهم .

رومل و منصور و حسين (بصوت واحد أمام الجمهور) : يا
عرب يا مسلمين يا مصريين ، المشكلة فيكم مش فيهم ،
المشكلة فيكم مش فيهم ، المشكلة فيكم مش فيهم ،
المشكل فيكم مش فيهم

(تنزل الستارة)

(تنتهي المسرحية)

شخصيات المسرحية

رومل : قائد الماني محنك و قائد الفيلق الإفريقي الالماني
خلال الحرب العالمية الثانية (١٩٣٩-١٩٤٥م) و معركة
العلمين عام ١٩٤٣ م .

منصور : ضابط في الجيش المصري خلال حرب ٦ أكتوبر
عام ١٩٧٣ م .

حسين : زميل منصور .

شوقي : زميل منصور .

هانزل : قائد عسكري برتبة عقيد في الفيلق الإفريقي خلال
معركة العلمين عام ١٩٤٣ م .

رايسكه : زميل هانزل .

موللر : زميل هانزل .